

den Vier Element zu sam gesetzt / in diser ordnung pleybt / dan  
yr vrsach / nemlich der hymlich lauff / vnd sein einfluss / sich all  
augen plick verendern.

So sein etlicher Planeten zusamenfügung / vnd ander yhr  
Aspect vntereinander vnd mit den festen stern / auß yr ange-  
schaffner natur gencygt / einzufließen vñ bewegen felten / etlich  
feuchtigkait / etlich dürrn / etlich hitz / etlich warm vñ feucht. 7c  
Wen nun ein gestirn kumpt mit einem hitzigen einfluss / das ge-  
schicht sonderlich / wen der Planet Mars (welcher an imselber  
vñ angeschaffner natur / bey den Astrologos hitziger vñ fewri-  
ger natur geacht wirdt / der selbigen qualitet auch anhengig ist  
die dürrn) mit andern festen stern seiner natur ein herscher ist / so  
bewegen sy warm vñ dürr tämpff im erdrich / vñ der sind zwais  
erlay / Etlich habē ein Lüfftige feuchtigkait in yhne / etlich aber  
nit / Sein solcher tämpff wenig / vñ müg / nit auß dem erdrich /  
machen sy die wasser vnter dem erdrich warm / Sein yhr aber  
vil vnd nit stat haben künne in den hōlen des erdrichs / mügē  
auch nit herauß prechen mit gewalt übersich / vnd machē also  
Erdpiden / Darumb vil vnd groß wind nach den Erpiden  
gemainglich kummen / Mügen aber solch Tämpff auß dem  
Erdrich / vnd habē kein lüfftige feuchtigkait / vñ sein yr wenig  
machen kein wind / sein yr aber vil / werdenn vngestüm wind  
darauß.

Haben aber die warmen Tämpff / ein lüfftige feuchtigkait /  
(die noch vil subtiler ist dan des öls) vñ sein der selbigē wenig  
vnd zerstrewt / enzündē sich ym lufft / vnd erscheinen darauß  
fallendē stern / prinnend fertzen / stangen / prandt / vñ der gleichē  
Ist des Tämpffs mehr vnd grösser / erscheinen im lufft feürige  
Trachen / fewrig springend gayß / fewrig männer / vnd ander  
seltzam fewrig ding / aber wern nit lang.

Wo aber solchs Tämpffs vil ist / vnd vhest beyeinander  
von wegen seiner subtilithet vnd ringheyt / erhebt er sich über-  
sich / vñ durch die krafft der stern durch den mitl tayl des luffts /